

海濱外史

涵芬樓秘
笈第五集

海濱外史卷一

科舉沿革

閩中 陳怡山記

明歷朝

洪武三年詔開科取士直省舉人通以五百名爲率

天通

百下
名止
于貢
京五

會試以百名爲率初場四書疑問及本經

義四書義各一道四書疑問者設爲疑事以觀其學
識如是年京師以大學古之欲明明德於天下二節
孟子道在邇一節合爲一題問二書所言平天下大
指異同是也四書義者本王安石所立之法但尙令

士子說明聖賢之旨意而不避下文如今之論是也然時文之胚胎已基之矣四年會試以江西解元吳伯宗爲狀元會元則俞友仁浙江仁和人五年壬子詔停科舉而命有司察舉賢良至十七年甲子始仍行鄉會試命禮部頒行科舉成式第一場四書義三道經義四道未能者許各減一道二場論一道詔告表內科一道判語五條三場經史策五道越十日再以騎射書算律五事試之凡四場皆合方准中式定子午卯酉年鄉試辰戌丑未年會試主試官一人訪求經明行贍之士先期幣聘鄉試四人會試八人再

提調官一員餘監試收掌謄錄對讀供給等官俱擇清慎者充之巡綽搜檢俱用武官其解義四書主朱註易主程傳及本義書主蔡傳及古注疏詩主集傳春秋主左氏公穀及宋張洽胡氏傳禮記主陳注及古疏應試者用監生一員及儒士未仕吏典官未入流者教官以職任教士不與鄉會試止錄士子籍貫姓名進呈洪武二十年始命撰程文三十年始命京朝官典會試

永樂六年戊子雲南始開鄉試七年己丑會試上北巡命中式陳璉等暫寄國子監讀書至九年辛卯回鑾

乃行殿試故有辛卯舉人辛卯進士之稱十三年甲午始命詞臣主北京試

洪熙元年禮部奏定科舉取士之額南士取十之六北士取十之四

宣德二年大學士楊士奇等言宜於南北卷內各退五卷以爲中卷中卷者四川廣西雲南及廬鳳等州府也四年命貴州附雲南鄉試雲南取中十名貴州一名七年詔增貴州中額四名

正統元年丙辰從祭酒陳敬宗言增會試額爲一百五十人鄉試增順天爲一百一十名應天爲一百名浙

江福建各六十名湖廣五十五名廣東河南各五十
名山東四川各四十五名江西六十五名山陝西
各四十名廣西三十名雲南貴州合二十名七年壬
戌會試由吏員中者二人由驛丞中者一人十年乙
丑擢商輅狀元及第輅鄉會試皆第一明三百年三
元惟輅一人而已十二年丁卯增雲南中額二名貴
州三名

景泰元年庚午命雲貴不必分額同取三十六名四年
癸酉廣鄉試中額順天應天各一百三十五名江西
九十五名浙江福建各九十名湖廣八十五名河南

八十名廣東山東各七十五名四川七十名山西陝
西各六十五名廣西雲貴各五十五名是年用禮部
周驥言務嚴防範外簾執事諸員俱用文官出身者
充之二年辛未殿試大風作掣王越卷去高騰不見
明年高麗貢使以其卷來云飄落王之殿瓦識者知
其立功域外也五年甲戌會試禮部尙書胡濙等上
言自今同考勿用教官及道府等官宜用翰林院春
坊及京官有學行者詔從之著爲令並廣會試額爲
三百名七年丙子大學士王文子倫陳子瑛皆應天
鄉試不中文與遂言主考劉儼黃忽略試文上

宥主考而准倫瑛爲舉人

天順四年庚辰會試有下第舉人數人訴主考徇私上
命試之文皆不稱乃枷于禮部門首七年癸未貢院
火焚死舉人九十餘人上憐之皆賜進士而移場期
于八月

成化十一年乙未會試命邱濬爲考官拔王鏊第一時
文宗派自此開

宏治十二年己未會試副考程敏政擬作策問存密室
中爲鄉人徐經窺見以語唐寅寅頗自矜又洩於其
友給事中華昶劾之詔逮問經承認寅莫能辨遂黜

寅等十餘人罷敏政官是科會狀論文敘廣東人後
其子以訓亦會元以諒舉解元父子三人四人艷
稱之十七年鄉試上從禮臣言各省典試用京官不
拘現任致仕惟擇有文行者未幾又以言官論罷之
正德三年戊辰會試鎖闈後太監劉瑾忽以片紙書舉
子五十人姓名傳令取中考官錯愕瑾聞之曰彼恐
奪賢者路耶今年命廣中額爲三百五十名

嘉靖七年戊子復遣京官典各省鄉試十三年甲午復
罷之十六年丁酉用給事中田秋言分雲貴爲兩省
鄉試雲南四十名貴州二十五名二十二年癸卯山

東鄉試錄策含譏訕命逮監臨御史葉經主考教官
周鑛等提調布政司陳儒等至京治之上曰教官豈
能抗御史於是杖經八十經斃杖下儒等各降調雜
職四十年辛酉給事中邛岳劾應天主考吳情私其
鄉人致取中本邑無錫舉人十三名上命情及副考
胡杰俱調外任自後南直人不許主考南闈試四十
三年甲子言官交論北闈關節八人俱用覆試文不
佳者斥之其同考官停用部曹又令各直省試卷並
解部稽察此磨勘之所由始也而需索陋規亦始於
此

隆慶五年辛未會試鄧以讚第一黃洪憲第二時人有
鄧黃之目

萬歷五年丁丑會試始定舉人教職試上等者授州學
正中等教諭下等訓導仍各准會試一次十三年乙
酉始命禮部先期采在廷諸臣學行兼優者列名俱
題欽點主考同考聘有文行教官一員與本省甲科
有司同充揭曉後中式硃墨卷俱解禮部會同該科
覆勘有文理不通者量行奏斥十六年戊子鄉試禮
部高桂言順天中式舉人鄭國望草止五篇李鴻文
理不通潘之惺茅一桂等五人俱噴有煩言而解元

王衡係輔臣王錫爵子不無可議乞加覆試詔禮部
都察院科道覆試諸人文理俱優准入會試二十九
年辛丑會試許獬第一王衡第二先期衡粘其文于
通衢以爲必元獬聞之粘其文于衡上衡見之曰不
如也榜發果然衡父錫爵鄉會皆第一殿試第二與
吾鄉李九我同衡戊子解元是科第二殿試亦第二
古人之奇如此四十一年癸丑詔進士舊額三百名
外嗣後增五十名四十四年丙辰會試言官論會元
沈同和乃第六趙鳴陽代作鞠之果然二人俱吳縣
人詔兩黜時謠云丙辰會錄斷么絕六

天啓元年辛酉鄉試以福建廣東山東江西試策內語
多狂恣正副考各鐫級

崇禎七年甲戌賜顏茂猷五經進士茂猷福建人天啓
甲子鄉試亦作五經監臨憐其才不貼出命止填本
經進閱竟得中中後方題請至是科復以五經題賜
進士九年丙子以流寇亂天子欲得將帥之臣詔曰
鄉會二三場皆兼武經書算習騎射著爲令十三年
庚辰會試放榜後上召進士四十八人於文華殿問
以疆場多警如何雪恥報仇魏藻德對云使大小臣
工共知所恥則功業自建娓娓數百言上韙之及殿

試親拔爲狀元踰年官拜大學士後李闖陷京師藻
德仕闖爲勒餉被夾二夾棍飲水一碗而死藻德

北

直人十六年癸未會試詔增鄉場中式爲四百名次

年國亡

國朝歷科

大清入中國經略洪承疇教以收拾人心之法以爲中
國之所以俯首歸誠者貪圖富貴也社稷雖亡而若
輩之作八股義者苟得富貴舊君固所不恤於是前
朝科第之人悉令爲官甲申卽位乙酉卽行鄉試丙
戌會試取中四百名秋再行鄉試丁亥又會試中額

如之壬辰會試言官論會元程可則首篇用七噫噉

不合詔覆試斥可則而第六名吳彥方亦革去以其

題君子有大道必忠信以得不雙頂理財用人而擢

張星瑞爲首然不名之爲會元矣十四年丁酉南北

闈關節貨賄致士子鼓噪扯破榜文上震怒北闈房

官張我璞李振鄴

當時有強千李萬之謠

嚴貽左田耜同日腰

斬南闈主考方猶副考錢開宗

書肆列傳奇名爲萬金記以方字去一點

爲錢字去偏旁爲金指二主考姓而言也

及分房官並棄市士之資緣

者褫革籍其家流徙塞外覆試北闈舉人拔米謹文

第一南闈舉人吳鳴珂第一賜鳴珂進士十五年戊

戊會試上諭諸考試官當秉公衡文以後若有買賣舉人者皆以軍法從事永以爲例十六年己亥以雲貴蕩平再行會試十七年庚子禁場中作五經文各省鄉試中額減舊一半

康熙三年甲辰會試改用策論八年己酉鄉試復用八股十二年冬吳三桂反十三年春閩廣俱反十五年蕩平十六年丁巳令天下捐納監生者北人皆赴京師南人皆赴浙江鄉試十七年戊午福建以下三府海氛未平未行鄉試十九年庚申補福建戊午科鄉試是科多父子叔姪同榜者但乙卯科至今尙未補

耳三十年辛未會試以江南浙江爲南左江西廣東
福建爲南右直隸山東爲北左河南陝西山西爲北
右四川雲南爲中左廣西貴州爲中右廬鳳二府徐
滁和三州仍歸南卷後以張鵬翮言仍改四川附於
南卷三十五年丙子鄉試部定直省舉子滿洲蒙古
取中二十名漢軍取中十名其順天生員取中八十
名南北監生取中五十七名又遼東三名宣鎮二名
共一百七十二名江南八十三名浙江七十一福建
同湖廣七十山東六十山西五十三河南六十二陝
西五十三江西七十五廣東五十七四川五十六廣